

至十五日見一切佛乘蓮華座而為說法得陀羅尼憶念堅固意志明了從是以後乃至菩提一切所聞憶持不忘一切經書工巧技術一切三昧心得清淨除見四諦何以故此法無漏所攝故說是法時師子奮迅菩薩及諸菩薩比丘天龍夜叉乾闥婆阿修羅世人非人聞佛所說歡喜奉行

師子奮迅菩薩所問經

佛說華聚陀羅尼呪經

失譯人名今附東晉錄

如是我聞一時佛在阿耨達多龍王宮中與諸比丘五百人俱菩薩摩訶薩滿足一千盡是一生補處皆得陀羅尼位十地猶如王子不久當得紹繼王位此諸菩薩亦復如是有大功德而自莊嚴不久當得灌頂之位得成作佛此諸菩薩各從他方諸佛世界而來集會於諸佛所心無疑滯時會眾中有一菩薩名曰師子奮迅從座而起偏袒右肩右膝

著地合掌向佛而白佛言世尊若有善男子
善女人盡其形壽一切樂具供養如來得福
多不佛告師子奮迅菩薩莫作是說心生疑
惑供養如來得福甚多何以故如來有無量
戒德無量禪定三昧無量智慧無量解脫無
量解脫知見并諸聲聞緣覺辟支佛及一切
賢聖其福甚多不可限量爾時師子奮迅菩
薩聞佛所說心生信解倍加恭敬供養尊重
讚歎即以衣服房舍卧具病瘦湯藥如是種
種一切樂具皆悉供養令無所乏若有善男

子善女人於如來滅度之後取佛舍利如芥
子許供養禮拜比前功德其福正等若復有
人持以七寶如須彌山等於一劫中布施聲
聞辟支佛得福多不也世尊佛言若有出
家在家之人能持一錢以用布施初發菩提
心人得福德比前功德百分千分百千萬分
不及其一乃至算數譬喻所不能及如是如
是如佛所說若復有人於如來滅度之後行
於曠路見於如來塔廟若善男子善女人能
以一華若一燈燭若一團泥用塗像前以用

供養若有善男子善女人持一銅錢施於佛
 像為補治故若以一掬水用灑佛塔地除去
 不淨乾華燭燼若燒香供養舉足一步詣於
 塔寺若一稱南無佛欲使此人墮三惡道百
 千萬劫終無是處佛告師子奮迅菩薩有陀
 羅尼名曰華聚多所饒益諸天世人有能受
 持讀誦通利如法修行所得福德倍過於上
 復有善男子供養聲聞緣覺辟支佛菩薩百
 千萬倍不及其一乃至算數譬喻所不能知
 是人命終終不至於八難之處卑賤之家在

所生處六情完具自識宿命常值三寶見佛
 聞法終不忘失菩提之心能得甚深無量辯
 才乘六神通遊至十方諸佛世界諮受妙法
 教化衆生爾時世尊即說呪曰
 多狄他 度羅尼 陀羅尼 陀羅尼 磨
 彌波 步婆散尼 悉題 旃題 涅目脂
 涅呵黎 慮伽盞帝 佛陀盞帝 帝黎
 烏迦羅知 佉伽羅知 羅殊波伽帝 帝
 闍和帝 毗舍羅佛題 曇摩波嘶 阿叉
 夜羯卑羯波和帝 阿彌多羯卑 休多舍

尼 帝聞知帝 泥勺婆摩一啼啼 帝聞
伽呵知帝 因題夜佛題 唾拏佛提莎訶
佛言有善男子善女人欲行此陀羅尼者若
二月三月若八月中從白月八日至十五日
淨目澡浴著新淨衣當於靜處坐佛形像懸
繒幡蓋華香供養禮拜懺悔晝夜六時誦此
陀羅尼若坐若行莫令心亂滿七日已當得
見佛若不見者復更二七三七七日專心誦此
陀羅尼必得見佛坐蓮華上而為說法是時
即得自識宿命念力堅固得陀羅尼無礙辯

才若求多聞若求禪定若求智慧若求辯才
若求醫方若求呪術若求工巧若求文藝如
是種種隨心所願悉皆得之乃至成佛終不
忘失除其四諦爾時師子奮迅菩薩諸天人
民及阿修羅諸比丘眾聞佛所說歡喜奉行

佛說華聚陀羅尼呪經